

Ruben Odor:

Un persona cu ta conoce placa manera su planta di man



ORANJESTAD (AAN)-- Den un entrevista cu DIARIO, Sr. Odor, yiu di e fundador di Museo Numismatico, Sr. Juan Mario Odor, a indica como el a cuminsa su prome pasonan den e historia di e placa di Aruba y di henter mundo.

Sr. Ruben Odor ta un persona

cu ta conoce manera su planta di man e historia di placa y el a conta cu ora e tabata chikito, su tata tabata colecciona placa caba y awor aki e tin mas o menos trinta aña den e actividad aki.


Na e comienzo, e tabata encarga di busca tur e informacion relaciona cu historia di

placa. Esey a haci cu el a haya hopi smaak pa traha den e ramo ey. Cu cierto informacion riba un placa specifico, nan a worde contacta personanan di pafo pa cumpra e placa y trece na Aruba pa sigui cu e coleccion, Odor a bisa.

Ora un persona ta bishita e museo, Ruben ta hopi encanta di introducie den un viahe atravez di e tempo.

Por cuminsa for di 1499 y weita kico tur nos antepasadonan a haci pa logra haya un medio pa por intercambia mercancianan entre si, pasando pa un diversidad di obhetonan cu a sirbi como simbolo di intercambio pa bin back te na actualidad, unda por haya e placa cu a usa e tecnologia mas moderno pa e fabricacion di e medio cu awendia ta worde usa den henter mundo.

Ademas di esaki, Ruben Odor a informa cu proximamente lo tin un muestra di material



di epoca Primitivo, Romano, Griego, Bizantino y Medieval.

Esaki kiermeen cu den e Museo Numismatico por haya un coleccion hopi completo di piezanan di hopi balor historico, pero tambe di

un gran balor personal pa ken a dedica, hunto cu su tata, hopi tempo na e estudio di un materia basta amplio y detaya di e simbolo cu tur dia nos ta usa pa realiza nos transaccionnan di “bienes y servicios”.